



13. august 2010

UKA 2010/32

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Qimmit aalajangersimasut, avatangiisiminnut ulorianarsinnaasutut nalilerneqartut eqqunneqartarnerisa kinguaassiorsinnaanerisalu inerteqqutineqarnissaat kiisalu qimmit taakku qimminik assignngisaminnik ernioqateqarsinnaanerisa pinaveersimatinnissaat anguniarlugu Naalakkersuisut suliniuteqarnissamut peqquneqarnissaannut Inatsisartuni aalajangiiffigisassatut siunnersuut.

(Inatsisartunut ilaasortaq Justus Hansen, Demokraatit)

Tunngavilersuut:

Demokraatini isumaqartuarpugut pinaveersaartitsineq aqputissaasoq. Isumaqarpugut, pingaaruteqartoq ajornartorsiuutinngorsinnaasut siulittornissaat iliuuseqarfigalugillu, ajornartorsiuut pinngortinnagu.

Demokraatini qimmit qaasussakkat aamma suanngarsakkat inuiaqatigiit toqqissillutik inuunissaannut ulorianartutut isigaagut, taamaattumik isumaqarpugut Naalakkersuisut piaartumik isumagisariaqaraat, qimminut taamaattunut innuttaasut – minnerunngitsumik meeqqat – illersorneqarnissaat.

Demokraatini ilisimavagut peqqussutit pioreersut ullumilu atuuttut qimmit qimuttut kiisalu qimmeqarnissaq qitsuuteqarnissarlu pillugit Inatsisartut Inatsisaanni nr. 18 30. Oktober 1998 – meersumi aqputigalugu. Tassani iluarisimaarlugu maluginiarparput Kalaallit Nunaanni inatsitigut piumasaqaataasoq, qimmit ukiup affaa sinnerlugu utoqqaassusillit pitoqqassasut, mattunneqaqqassasut, ungaluusani mattunneqaqqassasut imaluunniit PITUUTALERUGIT ANGALLANNEQARTASSASUT. Peqqussut tamanna Danmarkimi peqqussutitut atuuttunut naleqqiullugu sukanganeruvoq, Danmarkimi qimmit pituutaqartariaqanngimmata naalatsissinnaagaanni. Aamma iluaraarput, qimmit inunnik saassussisimasut imaluunniit uumasoaqatiminnik uiartuisimasut, ERNGIINNAQ toqunneqartassammata. Danmarkimi tamanna periarfissaavoq, piumasaqaataanani.

Immikkoortumili ataatsimi Danmarkimi peqqussutit atuuttut kalaallit nunaanni peqqussutitut atuuttunut naleqqiullugit sukanganerupput. Danmarkimi qimmit aalajangersimasut marluk eqquteqqusaanngillat ernioqateqqusaanatillu: Pitt bull terrier aamma Tosa. Qimmit taakku aamma qimminik allanik ernioqateqaqqusaanngillat.

Piffissap ilaani Danmarkimi oqallisigineqarpoq inerteqquteqarnermut qimmit allat qaasussakkat suanngarsakkallu ilanngunneqassannginnersut pillugu. Inatsisinik atoritsinermut ministereqarfik tamatumunnga atatillugu ataatsimiititaliamik pilersitsivoq, danskit qimmit pillugit inatsisaannik qimerluueqqissaartussamik siunertaralugu inatsisip sutigut sukaterneqarsinnaanerata



misissornissaa. Piffissami siunnersuutip matuma saqqumminnerata nalaani ataatsimiititaliap isumaliutissiisutissaa suli saqqummiunneqanngilaq.

Ataatsimiititalialli qimmit ulorianartut pillugit iliuuserineqartussanik eqqarsarnertik naammassereerpa. Iliuusissatut eqqarsaatigineqartut marluupput: inerteqquteqarnissaq aamma qasunganerusumik peqqussusiornissaq.

Inerteqquteqarnissamik eqqarsarnermit qimmit assigiinngitsut aqqaneq-marluk allat eqqunneqarsinnaajunnaarnissaat erniorteqqissinnaajunnaarnissaallu eqqarsaatigineqarpoq.

Ernioqqusinnginneq anguniarneqarpoq qimminik kinguaassiorsinnaajunnaartitsinikkut. Ikaarsaariarnermi, piffissami qimmit pineqartut Danmarkimi suli pigineqarfissaanni, piumasarineqarpoq pituutserlugit angallanneqartassasut aamma issaruteqartillugit angallanneqartassasut.

Aamma taamaassaaq qasunganerusumik peqqussusiortoqarpat, qimminilli pineqartunik assigiinngitsunik aqqaneq-marlunnik eqqussisoqarsinnaajuassaaq. Ataatsimiititaliami ilaasortat periutsip sorliup toqqarnissaa pillugu aveqqapput. Folketingimili partiit nalunaarutigeriigaat naapertorlugit ilimanarpoq inerteqquteqalernissaq aalajangiunneqarumaartoq.

Demokraatini isumaqarpugut, qimmit Pitt bull-it Tosallu eqqarsaatigalugit Danmarkimisulli Kalaallit Nunaanni inerteqquteqalerutta naapertuutissasoq aammalu inerteqquteqarnermi qimmit assigiinngitsut aqqaneq-marluk ilanngunneqartariaqartut, qimmit pillugit ataatsimiititaliap innersuussuteqarneratulli.

Tamanna atuutissaaq Kalallit Nunaanni qimmit taakku pigineqartut pigineqanngikkaluarpataluunniit, aammalu assersuutissaaqassagaluarpalluunniit ilumut qimmit taakku allanik saassussisimasut. Matumani pineqarput qimmit maannga nunamut naleqquttuunngitsut ulorianartullu. Pigineqassappata ulorianarput, maanilu nunami najugallit arlaannaalluunniit ulorianartorsiortinneqarnissaat pisariaqanngilaq – sualummik qitornagut.

Qimmit pillugit Ataatsimiititaliap eqqarsaatai utaqqinikuuagut. Taakkulu maanna tiguneqarsimalerput. Qimmit inerteqqutaareersut saniatigut allat aqqaneq-marluk immikkut ulorianartutut isigineqarput. Ima ulorianartigaat, danmarkimi inerteqqutaalernissaasa ukiup matumap ingerlanerani pinissaa naatsorsuutigineqarsinnaalluni. Assiganik inuiaqatigut illersussallugit pissutissaqarpugut.

Taamatut oqarluta Naalakkersuisut akissuteqarnissaat kiisalu partiit allat saqqummiussassaata qilanaarluta utaqqissavagut.



ILANNGUSSAQ:

- Fila brasileiro
- Dogo argentino
- Amerikansk staffordshire terrier
- Boerboel
- Kangal
- Centralasiatisk ovtcharka
- Kaukasisk ovtcharka
- Sydrussisk ovtcharka
- Tornjak
- Sarplaninac
- Staffordshire bull terrier
- Amerikansk bulldog